

HITZ BITAN

AHT

Proiektuaren aurkako mobilizazioa gaur, Tolosan

Erredakzioa | DONOSTIA

Tolosako Triangelu Plazatik abiatuko da gaur, arratsaldeko seieta, AHT gelditu! Elkarlana plataformak antolatu duen manifestazioa. San Frantzisko kaletik pasata, mobilizazioa Plaza Berrian amaituko da. Deialdiaren arrazoiak, antolatzailleen arabera, honakoak dira: «AHT geldiarazteko beharra aldarrikatzeko; eta gaitzespen zabala jaso duen makroproiektu horren inposaketa arbuizatzeko, bere justifikazio faltagatik nahiz eragingo lituzkeen kalte ekologiko, sozial eta ekonomikoengatik, baita nekazaritzari eta lurraldearen orekari eragingo lizkiokeenengatik ere».

AHT gelditu! Inposaketarik ez! da gaurko mobilizazioaren leloa, eta hainbat eragile sozial eta politikoren babesak jaso du. EHNE sindikatuak, esaterako, proiektu fasean dagoena azpiegitura erraldoi eta «txikitzaile» bat dela adierazi du, «baserri-

rrentzat eta, oro har, gizarte osoarentzat». Gizarteak proiektuari buruz «behar adinako» informaziorik ez duela salatu du, gainera. Proiektua erredaktatzeko sondeo lanetan gertatzen ari diren «irregularitasunak» nabarmentzeaz gain, Eusko Jaurlaritzaren «jarrera» ere aipagai izan du nekazari sindikatuak, euskal gizartearen proiektuari buruz dagoen «desadostasun nabaria» aintzat ez ei duelako hartzen. Abiadura Handiko Trenaren bidearen %90 nekazari lurretatik pasatzen da.

Aralarrek, Batasunak eta Zutik-ek ere, manifestazio deialdiarekin bat egin dute: Aralarrek, ingurumen eta inbertsio aldetik proiektuak «kostu izugarria» duelako; Zutik-ek, berriaz, proiektuaren kostu ekologikoak, sozialak eta ekonomikoak Euskal Herriaren beharrek «ez» datozelako bat; eta Eusko Jaurlaritzak «muzin» egin dielako zenbait udaletxe eta udalerri proiektuaren kontra agerturiko iritziz guztiei.



JON URBE / ARGAZKI PRESS

Energia berriztagarrien lehen parkea Usurbilen

Sabin Intxaurre Eusko Jaurlaritzako Ingurumen sailburuak eta Anjeles Iztueta Hezkuntzakoak Euskal Herriko energia berriztagarrien lehen parkea inauguratu zuten, atzo, Usurbilko Lanbide Eskolan. Parkean energia eolikoaren, geotermikoaren eta eguzki energiaren prozesu osoak biltzen dituzte, eta energia elektrikoaren eraldatze

eta banaketa zentro aurreratua ere badute. Energia berriztagarrien parkea trebakuntzarako erabiliko dute, bai ikasle gazteentzat, eta baita jada lanean ari diren langileen trebakuntzarako ere. Horrez gain, parkean Urrats Bat izeneko proiektua bultzatu dute, energia berriztagarrien inguruko ikasketak egin dituztenek lana aurkitzeko.

ISTRIPUA

Herenegun Azpeitia eta Lasao artean izan zen auto istripuaren lekukoak bilatzen ari da Ertzaintza

Ertzaintzak lekuko eskaera egin du herenegun goizean GI-631 errepidean, Azpeitia eta Lasao arteko zatian izan zen istripua argitu ahal izateko. Goizeko zazpiak eta hogeia aldera gertatu zen ezbeharra, Donostiako matrikuladun Iveco markako kamioi batek eta Opel Astra auto batek elkar jo zutenean. Talkaren ondorioz, autoko txoferra hil egin zen: I.A.A. azpeitiarra, 69 urtekoa. Lekukorik balego, Ertzaintzak bere Gipuzkoako Trafiko egoitzara deitzeko eskatu du.

DROGA

Anfetamina sulfatoa saltzeko sare bateko 11 kide atxilotu ditu Ertzaintzak aste honetan, eta 38 kilo droga atzeman

Ertzaintzak 11 lagun atxilotu ditu azken egunotan Bilbon, eta 38 kilo speed (anfetamina sulfatoa), kilo eta erdi haxix eta ehun gramo kokaina atzeman ditu. Horrez gain, atxilotuei speed-a manipulatzeko tresnak, suzko armak eta dirua ere atzeman zizkieten. Ertzaintzaren arabera, anfetamina sulfatoa Holandatik zekarten atxilotuetako batzuek, eta ekarritakoaren gehiena Araban, Bizkaian eta Gipuzkoan banatzeaz arduratzen ziren gainerakoak.

ETXEBIZITZA

Benta Berriko host etxebizitzatan okupa moduan bizi diren lagunek 10 egun dituzte handik alde egiteko

Donostiako Udalak Benta Berrin dituen bost etxebizitzatan baimenik gabe bizitzen ari ziren lagunei handik alde egiteko 10 eguneko epea eman zien atzo Udaleko gobernu batzordeak. Babes ofizialeko etxebizitza eskatua duen jendea dago bizitzen etxeotan, okupa moduan, eta Herrerako biziberritze urbanistikoko planak eragindako donostiarrek beteko dituzte eurak joandakoan.

EUSKARA

21 euskaltzain urgazle berri hautatu dituzte

Euskaltzaindiak, atzo Bilbon egindako bilkuran, 21 euskaltzain urgazle berri hautatu zituen: Joseba Agirreazkuenaga, Kepa Altonaga, Aurelia Arkotxa, Jon Arrue, Gidor Bilbao, Iñaki Camino, Jon Casenave, Xabier Erdozia, Izaskun Etxebeste, Juan Kruz Igerabide, Patxi Iñigo, Inaki Irazabalbeitia, Alan King, Jesus Mari Makatzaga, Koro Navarro, Maria Jose Olaziregi, Lourdes Otaegi, Paskual Rekalde, Ioro Segurola, Pello Telleria eta Miriam Urkia.

ERREPIDEAK

GI-627 errepidea itxi egingo dute bihar, Maltzagatik Soraluzerainoko tartean

Eguraldiak horretarako aukera ematen badu, GI-627 errepidea itxi egingo dute bihar, Maltzagatik Soraluzerainoko tartean, A-1 autobideko Larreategiko zubibidea konpontzeko. Goizeko 9etatik arratsaldeko 5ak bitartean egongo da itxita bidea. Bergararik Elgetara joateko, GI-2632 errepidea hartzeko gomendatzen zaie ibilgailu arinen gidariei, eta Elgetatik Bergarara joan nahi dutenei, GI-2639 hartzeko. Ibilgailu astunen gidariek, berriz, Arrasate (Epele) eta Durango arteko GI-632 errepide berria hartu beharko dute, Kanpazar gaina igarota. Donostiarantz abiatutakoek, azkenik, hiru aukera dituzte: Bergararik Zumarragara jo beharko dute Deskargatik (GI-632); Zumarragatik Azkoitira GI-631 bidetik; eta Azkoititik Elgoibarrera Azkarate gainetik (GI-2634).

GASOLINDEGIAN

DONOSTIALDEKO LANGILEAK
BEHAR DA MEKANIKAKO
EZAGUPIDEAK DITUENA.

943 27 92 11



Osakidetza
Servicio vasco de salud



OSAKIDETZAK JAKINARAZTEN DIE:

2003ko otsailaren batean, eguerdiko hamabietan, gasteizko erizain eskolan BFE analisi klinikoaren bigarren froga egiteko deituta zeudenei, bidaiatzeko arazoak izango omen dira, elurra dela eta, asterketa suspenditu egin dela.

2003ko otsailaren bostean, leku berean, gasteizko erizain eskolan (jose atxotegui kalea z/g), arratsaldeko bostetan froga izango da.

Informazio gehiago behar izanez gero, Osakidetza-Euskal Osasun Zerbitzuak Giza Baliabideetako Zuzendaritzako Hautaketa - Zerbitzura jo dezakezu, telefono hauetara deituz:

• 945 006 004 • 945 006 176 • 945 006 350

www.osakidetza-svs.org

Euskara irakasle izateko oinarritzko ikastaroa

100 orduko ikastaroa

Hasiera datak eta informazioa:

- Donostian otsailaren 10ean (943327172)
- Bilbon otsailaren 10ean (944152424)
- Gasteizen otsailaren 10ean (945218037)
- Iruñean otsailaren 24an (948220213)

Matrikula epea: ikastaroa hasi baino astebete lehenago

ANTOLATZAILA: AEK

